

lis Gnovis

■ CODROIPI. E je rivade la cjase de aghe

Le àn spietade a lunc, a Codroip, la cjase de aghe, che in di di vuê le clamin la "aghe dal Sindic"; si conte di almancul uns dodis agns, che intant chei di Codroip, par no murî di sêt, a àn fat front, chei plui sparagnins, cu la aghe de spine de cjase, biel che i plui siôrs a àn spindût alc di plui cu lis butiliis di minerâl te plastiche, e chei altris si son consolâts cuntune butilie di vin (blanc o neri, baste che al sedi bon...). Il regâl preseât al è rivât dal Rotary, che al à volût fâ fieste pai siei vinç agns di vite; e fieste grande e je stade, te zornade de inaugurazion, denant dal polisportif comunâl. La cjase de aghe, a son stâts duj dacuardi, e judarà a no strassâ chest ben di vite, a fâ di mancul di tante plastiche, che ançe i pes dal mâr no 'ndi puedin plui, e a favorî il cjatâsi de int ator de cjasute come un timp si cjatavisi, massime lis femenutis, cun su lis spalis un buinç, intor de fontanute dal país, stant che vuê no si pues fâlu nancje in place, o denant dal sagrât, par vie de dominazion automobilistiche. Cuiassè se, daspò dai discors, de benedizion e dal tai de curdele tricolôr, si è fat un brindis: e tal câs, cu la aghe de cjase o pûr cuntun tai di vin?

■ GLEMONE. Dulà ise la lunete cu la Madone di Amalteo?

Il pitôr Pomponio Amalteo, che al jere zinar dal Pordenone, a Glemone al devi vè cjatât un acet cussî bon, che i vevin dât di piturâ i cassetons dal sofit de glesie di Sant Zuan che, recuperâts in buine part daspò dal taramot, a stan ancjemò cirint cjase, parcè che chê di prime e je restade sdrumade. L'Amalteo, a Glemone, al à di vè cjatât propit un bon stâ, se plui di cualchi fantaçute dal puest i veve fat di bon voli, cussî che lui lis veve cjapadis a modelis par piturâ lis santis dal sofit de Glesie. Ma brauròs al jere, tant che un comitent i veve ançe comissionât, tal 1553, il fresc di une Marie Vergjine, che si cjatave intune lunete sot di un dai puartis che a puartavin viers dal Domo. Cumò no si cjate plui tal so puest, parcè che daspò dal taramot e je stade gjavade vie e restaurade, ma no si sa plui dulà che e je. Gabriele Marini, che al è stât sindic di Glemone, al à fat un apel ai proprietaris, al Comun e ae Sorintendence, par domandâur che e puedi tornâ al so puest, di mût che il so voli al puedi continuâ a cjalâ e a protezi chei che a passin par di sot di chel sotpuarti, cemût che e veve fat par agnorums.

■ FUSINIS. Il lâf Superiôr si sta jemplant

No bastin duj i disastris ambientâi causonâts dal om e dai events atmosferics, dal cambiament climatic di chest marimont, che si zonte ançe la scjarse atenzion di chel che al varès vût di jessi il "Zardinîr dal mont", che invezit di abadâ a tignilu di cont, lu trascure simpri di plui. Cumò, si stan jemplant ançe i lâts, come che al sucêt par chel Superiôr di Fusinis, dulà che toneladis di pieris, cladops e pantan lu stan jemplant. Si trate di materiâl che al diven dai procès naturâi che a sucedin tai pics des Alps. Par chest, a disin i esperts, al varès di jessi puartât vie dut il glream che al è stât traspuartât in tancj agns tal lâf, massime dai riui che a vegnin jù dal canalon dal Mangart e che al va a finî tal Vaisonz. Al covente un intervent urgent: si fevele di 40 mil metris cubis di materiâl e de necessitât di manutenzion des rostis che par cumò a somein jessi la soluzion miôr par fâ front a chest fenomen. Di presse, a zontin i esperts, parcè che se no si cjatarà in pericol ançe il prin lâf di Fusinis.

Miercus 20	S. te Sandre m.	Domenie 24	Domenie Ulive
Joibe 21	S. Serapion v.	Lunis 25	Lunis sant
Vinars 22	S. Benvignût v.	Martars 26	Martars sant
Sabide 23	S. Turibi v.	Il timp	Timp estròs



Il soreli
Ai 20 al jeve aes 6.09
e al va a mont aes 18.20.



La lune
Ai 25 Lune plene.

Il proverbi
Cui che al tire il cuartès che al tiri il pès.
Lis voris dal mès
Te setemane di San Josef plantait patatis,
po ae fin dal mès ur tocje a cocis, cucins,
carotis, jerbetis rossis.

Palme, la fuartece di Juli Savorgnan

*Al jere il fi di Jaroni
e dal pari al cjapà sù la
passion pe art militâr*

Cui jerial chel "Signor Giulio Savorgano, Conte di Belgrado etc, Signore Osservandissimo" che Filippo Pigafetta, tradutôr par volgâr dal libri 'Le Meccaniche del Signor Guido Ubaldo de' Marchesi de Medici' (1581), i veve dedicât il so lavôr? Ma al jere il fi di Jaroni, che al veve difindude la fuartece di Osôf cuintri i Imperiâi, sostignidôr de Serenissime e membri di une famee di militars dai secui XVI e XVII. Juli al jere nassût tal an 1509, l'an che al stave inviansi il declin sflaçôs de Serenissime, dopo de disfate patide al Agnatello, e il cjâf sbassât cu la Leghe di Cambrai. Ta chel an, Jaroni al fo riclamât de Svuizare dulà che al jere lâf par reclutâ, ma cence fortune, mercenaris par Vignesie, dantsi ogni mût a fiscâ i país ocupâts dai imperiâi, e vuadagnant, par chest, la nomine di Membri dal Grant Consei de Dominante. In chel moment la sô tierce femine (in dut a 'ndi varâ cuatri), i dave Juli, un dai vincjcuatri fis che al metarà al mont, e che dal pari al cjapà sù la passion pe art militâr. In famee - "c'est a dire" - Juli al pant fin di picul la sô passion pes disciplinis militars, matematichis e technichis, che lu puartaran a diventâ un inzegnîr militâr. E se al è merit di Francesco Maria della Rovere chel di vè puartât, in Italie, lis fortificazions bastionadis, al è merit di Juli Savorgnan chel di vèlis dopradis te costruzion e te riforme des fortificazions di Vignesie, massime "in propugnaculis", o ben tes fortificazions militars, servint Vignesie cun devozion disinteressade e cuasi mistiche, che



Juli Savorgnan

*Al veve
projetât une
gnove fuartece
ai confins dal
Friûl, Palme,
cence viodi
l'inizi dai lavôrs
parcè che al
murarà tal 1595*

i puartâ in ricognossiment, daspò dal so cumiât dal esercit, il premi di cualchi canon di artiliarie, che al metè te fuartece di Osôf. Tal so país al veve cussî inviât, cence badâ a spesis, la opare di rinfuarçament de rocje, ançe fasint sù gnovis muracis e rivielins, e metint man a une opare di deviazion dal Tiliment, cun chê di proviodi un acuedot pal so país. Ma il so pensionament al durarà par pôc par vie che i Turcs a tornavin a diventâ menaçôs, e

cussî Vignesie e decideve, par parâsi, di fâ sù une gnove fuartece ai confins dal Friûl. Par chest e domandâ a Juli, che intant al jere stât nomenât Sorintendent Gjenerâl des artiliaris e des fortificazions, il so parè par dulà fâle, e lui al proponè un puest tra Gurize e Gardisçe, no Udin, cemût che invezit a varessin volût i Deputâts dal Parlament Furlan. E di fat, al fo sielzût un puest vicin a Strassolt, clamât Palme, par ricuardâ la Palme de vitorie otignude te bataie di Lepanto cuintri i Musulmans. Il projet di Juli al proviodeve dome di fâ sù un bastion cu la sô cortine. Ai 7 di Otubar dal an 1593, inovâl de bataie di Lepanto, a scomençarin lis misurazions sul teren di chê che e diventarà la prime des trê cenglis de fuartece (la ultime le fassarà, doi secui daspò, Napoleon, che a Palme al zontarà, par meti la sô çate, ançe "Nova"). Ma Juli nol podarà viodi l'inizi dai lavôrs che al veve projetât, parcè che al murarà pôc daspò, tal 1595. A Osôf al fo sepulit suntuun bastion de rocje, e une epigrafe che al veve detât e diseve: "Nativitas vita et mortis quies, in propugnaculis sub Dio". No savin se altris de famee a vedin fat la sô cariere; dal sigûr ai siei canons ur tocjâ une sorte compagne a chê dai libris di pre Ferrante: a inrusinisi in cualchi dipuesit di fieram.

Roberto Iacovissi

Fieste de Patrie te Basse, iniziativa a Porphêt e Muçane

Primis iniziativa pe Fieste de Patrie dal Friûl inte Basse, inmaneadis cul finanziament de ARLeF - Agenzie Regionâl pe Lenghe Furlane e in colaborazion cu la Societât Filologjiche Furlane e cu la cooperative Informazione Friulana. Te sale civiche di Porphêt, vinars ai 22 di Març, aes 8 e mieze di sere, al vignarà presentât il documentari "Aquilee. La storie di une capitâl", di Marco D'Agostini e Luca De Clara. Sabide ai 23, aes 8 e mieze di sere, te sale parochiâl di Muçane, spazi ae comicitât cun B.A.R., gnove produzion de Associazion Teatrâl Furlane, che e mudarà il palc intune ostarie di país.

Tradizions furlanis dal mès par cure di Mario Martinis

DOMENIE ULIVE

La seste e ultime domenie di Cuaresime e ven clamade "Ulive" parcè che li si fâs la benedizion des ramis di ulif ("Dominica in ramis palmarum"), che po i ven daûr une piçule procession fintremai in glesie, dulà che ven celebrade une messe grande cul cjant dal "Passio", o ben de conte evangjeliche de passion e muart di Crist. Une volte, dilunc il Passio, di scuindon, culachidun al intaiave o al sculpive intune listute di len il famôs "grop Salomon" che al jere ritignût un fuart talisman cuintri ogni negativitât opûr a vignivin intreçadis dôs fueutis di ulif apene benedit (che e jere une stilizazion dal stes grop Salomon) par metilu te sachetute dal vistit come protezion. Finide la lungje messe, ognidun al puartave a cjase lis ramis di ulif benedit par metilis sot i crocefis, lis aghesantieris des cjamaris e i quadris cun inmagjinis sacris, jenfri la blancjerie, dentri i



paions e i armârs. Ma lis ramis di ulif benedit a vignivin doprâts ançe intune largje schirie di usancis cuintri lis strionariis, il demoni e ogni sorte di negativitât come pal trist timp de astât (burascjins, rogants, montanis, tampieste e code buje) e par benedi la nuvice, l'emigrant che al partive pal forest e, metûts tal calderin de aghe sante, come "asperges", pe salme dal muart. Pe difese dai ambients, i ramaçuts di ulif a vignivin sistemâts sui antîi des puartis di cjase e de stale o sui arbui dai cjamps o metûts sot tiere tai cuatri cjantons dai cjamps. Dopo vè brusât ulif benedit a vignivin fumigadis lis bestiis maladis de stale, lis stanzis dulà che vignivin alevâts i cavalîrs e lis personis culpudis dal malvolî, des faturis e di altris strionariis o chês che jerin interessadis a certis malatiis come la inflamazion di parts dal cuarp.